

2014.01.29

高永文局長，陳首銘會長，楊位醒會長，黃傑龍會長，胡新會長，各位嘉賓，各位傳媒朋友，大家好！

今日我好高興可以代表扶貧委員會社會參與專責小組出席今日餐飲業四大商會為支持「築福香港」活動所舉行的新聞發佈會。

首先我要向在座各位餐飲業朋友衷心講聲多謝，因為你們咁團結響應「敬老月」活動，起咗帶頭作用，為「築福香港」希望凝聚各方力量去幫助弱勢社羣做咗個好好的示範同榜樣。亦多謝高永文局長在百忙中親臨出席支持，為我們打氣！！

其實香港餐飲業，在過去不時都在香港各區主辦贈飲食的活動俾社會上不同的弱勢社羣，不過都係各自做，分散做，亦無刻意去宣傳，所以大家無為意。

記憶所及，上一次餐飲業全人咁齊心，是在 2003 年沙士之後團結力量搞活動救香港經濟。

誠然，「落雨天」大家團結一起，守望相助，係理所當然的。

難得嘅係而家「好天」大家也不忘照顧弱勢社羣，凝聚力量支持「築福香港」農曆新年敬老月。今次餐飲業四大商會聯手在港九新界各區招待長者，印象中似乎是第一次！

「築福香港」推出之後，我們聽到社會有的聲音帶有存疑態度，認為各行各業遊請基層人仕睇一次賀歲盃足球，或單親家庭遊一次飛機河，甚至請長者食一餐飯，有乜用？需知道住係新界東北嘅基層家庭，兒

童，年輕人，好多咁近機場都無機會去參觀，坐飛機根本不可想像，同樣，佢哋坐巴士過海到香港都付擔唔起車費，去政府大球場睇波要幾百元張票更是遙不可及。我們所做的是希望佢地試過第一次，就有渴求鼓勵自己去努力創造第二次。

過年過節，普天同慶，但獨居老人或隱蔽長者可能被人遺忘，我們得到餐飲業招待他們飲餐茶，食點心，歎春茗，透過社福界，NGO 和地區政府，搵受忽略的長者出來分享春節歡樂，令佢地知道社會上還有人關心他們，記得他們！這就是人間有情！

築福香港宣傳活動雖然祇舉行 6 個月，我們會呼籲商界同各行各業，推動活動照顧社會上方方面面不同類別的弱勢社羣及基層人仕，作用不祇是一次性嘅招待或受惠，我們推行的是守望相助的扶貧精神和捨得文化，令每個人都有「我幫你，你幫我」的心態，構成一種社會風氣，希望習以為常，人人多做好事。

有人講過：扶貧需要「物質力量」，更需要的是「精神力量」，亦希望傳媒朋友多報導，發揮你們的「新聞力量」，宣揚工商各界扶持弱勢社羣的善舉，等社會充滿正能量，關懷，愛心和溫暖！

除咗餐飲業，我們剛剛收到離島扶輪社通知佢地會在年初十在長洲舉行招待千人長者的點心派對，而中華總商會亦響應係屬下七個中心招待 600 位老人家點心春茗。

春節敬老，遍地開花，實在令人開心和鼓舞！

築福香港 logo 由四個福字組合而成，代表惜福·積福·造福同幸福，大家都認同「能夠幫人是你的福氣」，我地每人行多一步，做到加零一，令受助者開心，助人者心中滿足，香港就會成為名符其實的福地！

最後我再次感謝餐飲業全人發起的帶頭作用，響應「築福香港」敬老月，令工商各界推行的扶貧運動有個好的開始。

再過兩日就是年初一，在這裡我向大家拜個早年，祝各位在馬年，龍馬精神，馬到功成，恭喜發財！

多謝大家！